



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE
DREJTORIA PËR MBROJTJEN E TË DHËNAVE PERSONALE

Nr. 163 / 5 Prot.

Tiranë më 17.07.2020

REKOMANDIM

Nr. 15, datë 17.07.2020

PËR KONTROLLUESIN “*KONFEDERATA E SINDIKATAVE TË SHQIPËRISË*” (KSSH)

Në mbështetje të neneve 29, 30 dhe 32 të ligjit nr. 9887, datë 10.03.2008 “*Për mbrojtjen e të dhënave personale*” i ndryshuar (në vijim “*Ligji*”), ligjit nr. 44/2015 “*Kodi i Procedurave Administrative të Republikës së Shqipërisë*” (në vijim “*Kodi i Procedurave Administrative*”), procesverbalit të hetimit administrativ dhe provave të administruara në ngarkim të kontrolluesit “*Konfederata e Sindikatave të Shqipërisë*”,

KONSTATOVA SE:

Në zbatim të Urdhrit nr. 26 datë 11.02.2020 të Komisionerit për të Drejtën e Informimit dhe Mbrojtjen e të Dhënave Personale, u krye hetimi administrativ pranë kontrolluesit “*Konfederata e Sindikatave të Shqipërisë*” (në vijim, “*Kontrolluesi*”), me objekt:

- Verifikimi i ankesave të paraqitura pranë Zyrës së Komisionerit nga disa qytetarë si dhe zbatimi i ligjit nr.9887 datë 10.03.2008 “*Për mbrojtjen e të dhënave personale*”, i ndryshuar dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale.

Hetimi administrativ, pranë kontrolluesit, u fokusua në:

- (i) trajtimin e ankesave të paraqitura pranë Zyrës së Komisionerit nga disa subjekte të të dhënave personale, të cilët pretendonin se Kontrolluesi kishte publikuar në llogarinë e tij në rrjetin shoqëror “*facebook*”, listpagesat me të dhënat e tyre personale, pa marrë më parë pëlqimin e këtyre të fundit, në kundërshtim me parashikimet e Ligjit; dhe
- (ii) verifikimin e ligjshmërisë së përpunimit të të dhënave personale nga Kontrolluesi, gjatë ushtrimit të veprimtarisë së tij.

Zyra e Komisionerit, pasi shqyrtoi relacionin e hetimit administrativ, procesverbalin e konstatimit dhe provat e administruara gjatë ushtrimit të hetimit, vëren se:

1. Kontrolluesi ka publikuar në llogarinë e tij në rrjetin shoqëror “facebook”, më datë 11.01.2020, ora 16:37, fotografi të disa listëpagesave, të cilat përmbajnë të dhëna personale të disa ish-punonjësve të “Albchrome” SHA, të tilla si: emër, mbiemër, paga bruto dhe neto për secilin prej tyre.
2. Kontrolluesi ka deklaruar se të dhënat personale të publikuara në llogarinë e tij në rrjetin shoqëror “facebook”, janë marrë nga llogaria në rrjetin shoqëror “facebook” të “Federatës Sindikale të Punonjësve të Industrisë të Shqipërisë” (FSPISH).

Zyra e Komisionerit ka konstatuar se publikimet në rrjetin shoqëror “facebook” janë bërë sipas këtij rendi kronologjik:

- FSPISH, më datë 11.01.2020, ora 16:31;
- KSSH, më datë 11.01.2020, ora 16:37;

Zyra e Komisionerit vlerëson se, pavarësisht kohës, mënyrës dhe qëllimit të publikimit nga ana e Kontrolluesit, kjo përbën shkelje, pasi konsiderohet përhapje e paligjshme e të dhënave personale, në kundërshtim me detyrimet e parashikuara në nenet 5 dhe 6 të Ligjit.

3. Provat e paraqitura nga ana e Kontrolluesit nuk vërtetojnë plotësimin e kriterëve ligjore të përpunimit, në kuadër të legjitimitetit të përhapjes së të dhënave personale në lidhje me marrjen e pëlqimit paraprak të subjekteve të të dhënave, në kundërshtim me parashikimet e nenit 6 të Ligjit.

Zyra e Komisionerit vlerëson se, marrja e pëlqimit është e vetmja mundësi ligjore e kontrolluesit, referuar germës a), të pikës 1, të nenit 6, të Ligjit për të legjitimuar përpunimin e të dhënave personale. Pëlqimi, në bazë të pikës 24, të nenit 3, të Ligjit duhet të jetë në formën e një deklaratë me shkrim, i dhënë shprehimisht me vullnet të plotë e të lirë nga subjekti i të dhënave, duke qenë në dijeni të plotë për arsyen pse të dhënat do të përpunohen, çfarë nënkupton se subjekti i të dhënave pranon që të dhënat e tij të përpunohen.

Për sa kohë Kontrolluesi nuk ka mundur të provojë ekzistencën e pëlqimit të ankuesit për publikimin e të dhënave të tij, vlerësojmë se përpunimi i të dhënave cenon edhe parimin e sanksionuar në germën a), të pikës 1, të nenit 5, të Ligjit.

Në përfundim të hetimit administrativ, referuar provave dhe konstatimeve në vend, grupi i hetimit administrativ hartoi procesverbalin përkatës.

Zyra e Komisionerit vlerëson bashkëpunimin e Kontrolluesit me grupin e hetimit administrativ dhe reagimin e tij për rikuperimin e shkeljeve të konstatuara. Plotësimi i këtyre detyrimeve nga ana e Kontrolluesit është mjaft i rëndësishëm, pasi garanton

përpunimin e ligjshëm, sigurinë e të dhënave personale dhe ndalon mundësinë e përhapjes së tyre në mënyrë të paligjshme.

Sa më sipër, në zbatim të neneve 5, 6, 29, 30, 31 (pika 1, germa "a/1"), si dhe 32 të Ligjit,

REKOMANDOJ:

1. Kontrolluesi "*Konfederata e Sindikatave të Shqipërisë*", të realizojë në mënyrë të menjëhershme fshirjen e të dhënave personale të ankuesve dhe personave të tjerë të, dhënat e të cilëve janë publikuar në llogarinë e tij në rrjetin shoqëror "*facebook*", si dhe çdo platformë tjetër të kësaj natyre;
2. Në zbatim të pikës 1 të nenit 32 të Ligjit, ky detyrim të përmbushet menjëherë.

Afati fillon nga data e marrjes dijeni të këtij akti.

3. Kontrolluesi të njoftojë Komisionerin për masat e marra.

Në rast mospërmbushjeje të detyrimeve të parashikuara në këtë akt, Komisioneri vepron sipas pikës 2 të nenit 30 dhe nenit 39, të Ligjit, të cilët parashikojnë se në rast shkeljesh serioze, të përsëritura ose të qëllimshme të Ligjit nga një kontrollues ose përpunues, veçanërisht në rastet e përsëritura të moszbatimit të rekomandimeve të tij, Komisioneri vendos sanksione administrative për kundërvajtjet administrative përkatëse dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë 17.07.2020.

KOMISIONERI

Besnik Dervishi

